

Maria Barla Caduff-Hendry, Rueras



giavisch ein els i cun ella a Trun egl asil s. Martin. Mo sia dimora leu ha cuzzau mo nov dis. Igl ei stau sia ura e miraclas san ni miedis, ni soras, ni spitals far. Igl ei envan de far silsunter unviars e reproschas. Il carstgaun propona e Dieus dispona. Han ins fatg tut quei ch'ins ha anflau per bien, necessari e dueivel, sche ein ins satisfats.

La defuncta Maria Barla Caduff-Hendry ei naschida a Cavorgia ils 14 de settember 1908 sco feglia de Giachen Martin e Barla Catrina Hendry-Peder.

Ella ei carschida si en ina famiglia numerusa da 10 affons ed ha sco la tiarza gronda saviu segidar culs fargliuns pigns. E co ella ha fatg quei! Ina da quellas luvreras anflan ins veramein darar. Per ella era nuot memia bia. Cu ei fuva de segar, sche stuevan ses frars schar ora cups per ch'ei vegnien buca catschai ord il canvau. Ed ils anno 20 e 30 nua che la biestga pagava ina piparia tuccav'ei de sedar ora e mirar co ins aveva schiglioc aunc fadgiar in pèr raps.

F.H. Cumpignar in carstgaun sin santeri, ch'ins ha duront decennis e decennis carezau, stimau ed admirau ei in fatg che va a funs e che fa ponderar e reflectar. Ins seregorda da dis plein sulegl, dad eveniments delectonts e forsa era dad uras, nua ch'ins ha cartiu ch'il sulegl seigi ius da rendiu e sesaulzi mai pli davos la pezza siadora. Bi e bien, deletg e perfetg fan de pegliar cun empruament e munglament, cun mitgiert ed entiert. Quei ei la veta e la sort sin quest mund. Umbriva e sulegl sebrattan, tiels ins aschia e tiels auters empau auter.

Far tut quei ch'ins sa pil bien e restont duei esser devisa e pigl auter secumadar, sestentar, sperar e fidar.

Ils 2 de fenadur 1988 ei Maria Barla Caduff-Hendry morta ella biala vegliadetgna de quasi 80 onns. Il davos temps mava ei culla Barla nuota propi bein. Ina curdada malempudada ell'atgna casa ha probabel tuccau e disturbau zattei en siu intern. Ses affons ed il miedi han dau tutta stenta e breigia pusseivlà ed ein secussegliai e secussegliai tgei far per segidar culla Barla. Suandond siu

Buca ils menders gudogns accessorics eran leuvi a Cavorgia igl ir per bulius ed izuns e cavar ragischs d'ansauna. Tgei buordis che la Barla rabitschava a casa! Aschia eis ella era aunc stada en piazza tscheu e leu en Tujetsch. Il pli ditg eis ella stada tier sur Gion Antoni Venzin, caplon a Rueras.

1937 ei la Barla maridada cul Stiafen Caduff, da Rueras. Quei ei propi stau in um ch'ei ius a pèr cun ella. Domisdus plein fiug e flomma e prompts pil combat della veta. Negina lavur stermentava els. Aschia eisi capeivel ch'il diember della biestga crescha en lur nuegl. E vevan ei zacu in tec temps danvonz, sche sespruava in sco l'auter d'augmentar las entradas tscheu ni leu cun quei ni cun tschei. Igl ei buca de far curvien ch'in tal engaschament e quella tenuta han possibilitau ad els de baghegiar ina casa gia igl onn 1939. – Era en casa ei la lavur carschida. Il Segner ha benediur lur lètq cun tschun feglias ed in fegl.

Tuts ein oz maridai, dus ein secasai en Tujetsch e quater tscheu e leu giu la bassa.

1971 ein las circumstanzas stadas favoreivlas per baghegiar ord ils dus tschalers giu encunter la via ina fatschenta cun cascharia e stizun. Per dus umens sco il bab Stiafen ed il fegl G. Martin era la lavur de pur memia pinga. Ed els ein sedai ora e quei cun success. E paucs onns sunter ei il fegl maridau. Bab e mumma han giu la curascha de baghegiar gest sper la casa existenta ina nova. Plein fidonza en Diu ein ils geniturs secasai 1975 en quella. E la Barla fa malgrad che siu tgierp dola e mudregia ella da temps en temps dil bi e dil bein vinavon la lavur da pur cun siu Stiafen. E quasi diesch onns han ei saviu far quei. Mo tuttenina ha ina malsogna maligna e perfida taccu il Stiafen e tschuncanau quella plonta robusta enteifer paucs onns. Il november 1985 ei la Barla vegnida vieua. Il bien consort Stiafen maunca dapertut e la Barla ei tut piarsa. Per cletg segidan ses affons secasai a Rueras schi bein sco ei san cun ella. Era las feglias maridadas giu la bassa vegnan adina puspei a Rueras e portan succuors e scursaneschan ad ella empau las liungas uras. Mo las forzas lain pli e pli sunter. Ed il di de comiau vegn. A caschun della sepultura ils 5 de fenadur ha sur Benedetg Baselgia ch'ha exequiu las funcziuns funerals finiu suandontamein ses plaids da comiau: «La defuncta ei stada inschignusa e luvrusa, mo dasperas adina giu temps e peda per ir stedi en baselgia aschi ditg ch'ella ha zaco pudiu. Era fuva la Barla generusa, ella patertgava als basegns da nies temps ed haveva maun aviert.»

Segner, pren si la Barla en Tiu reginavel e lai ruassar ella en paisch.